



折獄龜鑑卷八

嚴明

何武

前漢時沛縣有富家翁貲二十萬一男纔數歲失母別無親屬一女不賢翁病困思念恐其爭財兒必不全遂呼族人爲遺書悉以財屬女但餘一劍云兒十五付之後亦不與兒詣郡訴太守何武因錄女及婿省其手書顧謂掾史曰女旣強梁婿復貪鄙畏賊害其兒又計小兒正得此財不能全獲故且付女與婿實寄之耳夫劍所以決斷限年十五力足以自居度此女婿不還其劍當聞州縣或能明證得以伸理此凡庸何思慮深遠如是哉悉奪其財與兒曰弊女惡婿

按弊字通典作

蔽温飽十年亦已幸矣聞者歎服舊出風俗通 案此事亦見杜佑通典原本多誤字

謹依通典改正

按張詠尚書知杭州先有富民病將死子方三歲乃命壻主其貲而與壻遺書云他日欲分財即以十之三與子七與壻子時長立以財為訟壻持書詣府請如元約詠閱之以酒醑地曰汝之婦翁智人也時以子幼故此囑汝不然子死汝手矣乃命以其財三分與壻七分與子皆泣謝而去見李叟虞部所撰忠定公語錄此正類何武事也夫所謂嚴明者謹持法理深察人情也悉奪與兒此之謂法理三分與壻此之謂人情武以嚴斷者壻不如約與兒劔也詠之明斷者壻請如約與兒財也雖小異而大同是皆嚴明之政也

鍾離意

後漢鍾離意為會稽北部督郵有烏程男子孫常與弟並分居各得田四十頃按四十頃通典作十頃並死歲饑常稍以米粟給並妻子輒追計直作券沒取其田並見長大訟常掾史皆言並兒遭餓賴常升合長大成人而更爭訟非順遜也意獨議曰常身為伯父當撫孤弱而稍以升合券取其田懷挾姦詐貪利忘義請奪其田畀並妻子眾議為允見通典不著出處舊集不載按聽訟者或從其情或從其辭夫常取並妻子田固有辭矣奈其懷挾姦詐貪利忘義之情何意獨以情責常是不從其辭而從其情也可不謂之嚴明乎

陳矯

魏陳矯為魏郡太守時繫囚千數有至歷年矯以為周有三
典之制漢約三章之法今惜輕重之理而忽久繫之患可謂
繆矣自覽罪狀一時論決出魏志本傳舊集不載

按此蓋罪狀已定而輕重有疑吏不敢決者也使有罪不
論無罪久繫自古以為患矣然拘文之吏每每如此繆可
知也易曰君子以明慎用刑而不留獄矯自覽罪狀所謂
明慎也一時論決所謂不留獄也若罪狀未定者慮有冤
誣理當考覈豈可取快一時耶君子於此宜盡心焉

王敬則

南齊王敬則為吳興太守錄得一偷召其親屬於前鞭之令
偷身長掃街路久之乃令舉舊偷自代諸偷恐為所識皆逃

去境內以清出南史本傳舊集不載

按偷之冒法初不畏罪設此二事令其厭苦庶或可戢也
裴俠

後周裴俠為戶部中大夫時有姦吏主守倉儲積年隱沒至
千萬者及俠在官勵精撻發旬日之間姦盜畧盡轉工部中
大夫有大司空掌錢物典悲泣按北史作掌錢典李貴乃於府中悲泣或問其
故對曰所掌錢物多有費用裴公清嚴懼遭罪責俠聞之許

其自首出北史本傳舊集不載

按彼未知懼也俠則治之此已知懼也俠則宥之其治之
者可以為嚴矣其宥之者可以為明矣明者無他灼見物
情也

趙爽

隋趙爽為冀州刺史嘗有人盜爽田中蒿為吏所執爽曰此乃刺史不能宣風化彼何罪也慰諭遣之令人載蒿一車賜盜者愧恥過於重刑見北史本傳舊集不載

按嚴明者不必厲威刑也察見物情中其忌諱有過於市朝之撻者爽載蒿賜盜蓋以此耳不然則彼將玩侮尙何愧恥哉

王錡蕭疑附

唐王錡為淮南節度使有遺匿名書於前者左右取以授錡錡納之鞞中先有他書以雜之吏退錡採取他書焚之人信其匿名書亦焚也既歸而省所告異日以他微事連所告者

禁繫按驗以譎其眾下吏以為神明出唐書本傳舊集不載

按南齊豫章王疑不樂聞人過失左右投書相告置鞞中竟不視取焚之錡蓋樂聞人過失者則其譎也不若疑之正也昔朱博每遷徙易官所到輒取奇譎以明示下為不可欺者錡豈慕其為人歟

張希崇

晉張希崇鎮邠州按張希崇鎮邠寧在後唐明宗時書中作晉當作後唐為是有民與郭

氏為義子自孩提以至成人後因房不受訓遣之郭氏夫婦相繼俱死有嫡子已長郭氏諸親教義子訟云是真子欲分其財前後數政不能決希崇判曰父在已離母死不至雖云假子辜二十年養育之恩儻是親兒犯三千條悖逆之罪甚

為傷害民教豈敢理認田園其生涯盡付嫡子所有訟者與其朋黨委法官以律定刑聞者皆服其斷舊不著出處

按唐制選人試判三條辭理愜當決斷明白乃為合格謂之拔萃希崇之判蓋本於此惟其愜當明白是故聞者皆服也

張齊賢王延禧附

張齊賢丞相在中書時戚里有爭分財不均者更相訴訟又因入宮自理於上前更十餘斷不服齊賢曰此非臺省所能決也臣請自治之上既許乃坐相府召訟者問曰汝非以彼所分財少乎皆曰然即命各供狀結實且遣兩吏趣徙其家令甲家入乙舍乙家入甲舍貨財皆安堵如故文書則交易

之訟者乃止明日奏狀上大悅曰朕固知非卿莫能定也出司

馬光丞相
諫水紀聞

按曾肇內翰撰王延禧朝議墓誌云延禧任岳州沅江令時有兄弟分財者弟弱所得田下訴不均詰其兄曰均矣即令二人以所得更取之兄訴於州州守笑曰此張詠尙書斷獄法也豈彼所聞異乎

燕肅鞠真卿附

燕肅侍郎知明州俗悍輕喜鬪肅推先歐者雖無傷必加以罪後歐者非折跌支體皆貸之於是鬪者為息見本傳

按民之鬪歐傷有輕重理有曲直不治其傷而治其理者乃息鬪之術也若折跌支體則理雖直而傷已甚斯不可

貨矣譬猶鬪殺用刃以故殺論蓋其情重也 沈括內翰說鞠真卿知潤州時民有鬪歐者本罪之外別令先下手者出錢以與後應者小人斫財兼不甘輸錢於敵人終日忿爭相視無敢先下手者蓋無賴之民不畏杖責故設此事以折伏之與王敬則治獄之術同也見筆談近時州縣間固有使民輸下拳錢者然官自取之則不足以懲惡而適所以招怨斯失其本矣豈若不治其傷而治其理之簡易乎

韓琚齊思賢附

韓琚司封嘗通判虔州其民善訟或偽作冤狀悲憤叫呼似若可信者會守缺琚行郡事究其風俗考其枉直下莫能欺

辭伏者自以為不冤終於兩浙轉運使魏公琦之兄也見尹洙龍

墓誌圖所撰

按沈括內翰說江西人好訟有一書名鄧思賢皆訟牒法也其始則教以侮文侮文不可得則欺誣以取之欺誣不可得則求其罪以劫之鄧思賢人名也始傳此術遂名其書村校中往往以授生徒見筆談然則琚所以究其風俗考其枉直者豈特下莫能欺蓋亦人不可劫不可劫所以為嚴也莫能欺所以為明也彼其辭伏者自以為不冤非此故歟

葛源

葛源郎中初以吉州太和簿攝吉水令他日令始至猾吏誘

民數百訟庭下設變詐以動令如此數日令厭事則事常在吏矣源至立訟者兩廡下取其狀視有如吏所為者使自書所訴不能書者吏受之往往不能如狀窮輒曰我不知為此乃某吏教我所為也悉捕劾致之法訟以故少吏亦終不得其意

見王安石丞
相所撰墓誌

按為政者苟欲戢吏唯嚴明可夫民雖好訟也若非吏與交通亦焉能獨為欺誣劫持之計耶吏不得其意則民訟宜少矣源使民自書所訴不能書者吏受之乃鞫民情覈吏姦之術也彼既姦滑自當畏戢操術如此不亦可乎

劉敞

劉敞侍讀知永興軍時大姓范偉冒武功令祚為祖乃穿祚墓以已祖母耐之規避徭役者五十年數犯法至徒流輒以贖免長安人共患苦之然吏莫敢治敞按其事獄未具而召由是辭屢變證逮數百人獄連年不決詔取付御史臺驗治卒如敞所發

見本
傳

按范偉之橫人患苦之然敞按其冒蔭避役證逮數百人連年不決者何也彼與黨與結之厚矣乃敢爾也證逮之人其黨與也豈易鞫哉且長安人共患苦之然吏莫敢治則桀黠可知也非按者嚴明不能發其事非鞫者嚴明不能得其實是故姦民多幸免也獄辭屢變蓋以此與

許元

許元待制初為發運判官患官舟多虛破釘鞫之數蓋以陷

於木中不可稱盤故得為姦元首至船場命曳新造舟縱火
焚之火過取其釘鞠稱之按劉熙釋名較鏑也關西謂之釘
較此文釘鞠無出或即釘較聲之

說此所破纔十分之一自是立為定額見魏泰東
軒筆錄

按元不治虛破之罪而但立為定額可也然亦異乎劉晏
矣蘇軾尚書說晏江淮發運使時於揚州造船每隻載
米一千石破錢一千貫而實費不及五百貫或譏其枉費
晏曰大國不可以小道理凡所創制須謀經久船場執事
者非一有餘剩衣食可以養活衆人則私用不窘而官物
牢固由是船場人皆富贍五十餘年饋運不闕至咸通末
有吳堯卿者始勘驗每船合用物料實數估給其直無復
寬剩而船場自此破壞饋運自此闕絕晏言大國不可以

小道理良可信也見奏議元定釘鞠額無乃類吳堯卿乎雖

幸而不至敗事然其嚴明乃俗士所誇君子所鄙不可為
後世法也

張式

張式郎中初為南劍州將樂縣主簿有銀冶坐歲課不足繫
者常數十百人式籍其人使貧富財力相兼課遂有羨人無

繫者見王安石丞
相所撰墓誌

按式知銀冶歲課所以不足蓋緣冶戶或有財而無力或
有力而無財於是籍其人使富貧財力相兼則富者不患
力乏貧者不患財窘課遂有羨理宜然也昔之繫者常數
十百人今則人無繫者矣嚴明之政不當如是乎

孫甫

孫甫待制為華州觀察推官時州倉粟惡吏當負錢數百萬轉運使李紘以吏屬甫乃令取斗粟舂之可棄者十纔一二又試之亦然吏遂得弛負錢數十萬而已紘因薦之見曾鞏舍人所

撰行狀

按嚴明者非若世俗以苛為嚴以刻為明也持循事理照察物情之謂也以事理言之則倉粟雖惡不應盡可棄也以物情言之則負錢數百萬將何以償耶甫取斗粟舂之可棄者十纔一二但負錢十萬而已吏既得弛重負官亦獲保舊積是持循照察之效也可不謂之嚴明乎

周沆

本傳鹽價一事附

周沆侍郎嘗為河東轉運使自慶歷以來河東行鐵錢民多盜鑄吏以峻法繩之抵罪者日繁終不能禁沆乃命高估鐵價盜鑄者無利不禁自息見司馬丞相所撰神道碑

按沆知慶州時邊民多闌出塞販青鹽沆請損官鹽之價犯者稍衰見本傳夫或高鐵估或損鹽價法異而意同皆治其本也治其末者雖繩以峻法而終不能禁徒為苛劾耳治其本者雖處以平法而姦盜自止豈非嚴明乎苟欲嚴行正理要惟明見事情然後政不苛暴事不刻核而獄訟省矣彼籍治而課羨舂粟而負少者亦猶是也

王罕

王罕大卿知潭州民有與其族人爭產者辨而復訴前後十

餘年罕一日悉召立庭下謂曰諸家皆里富人無乃厭追逮之苦今無狀子寒饑不能以自存况析產之券有不明以故久不決人能少資之令其遠去後復何患乎皆泣聽罕命自言方對吏時雖欲求爲此顧不可得於是遷所訴者於旁州獄訟爲之衰止

見王珪丞相所撰墓誌

按嚴明之術在於察見物情裁處事體彼爭產者困於寒饑析產者苦於追逮理之曲直何足深校苟或可已無不聽命於是人少資之令其遠去則析產者所損不多而免追逮之苦爭產者所得不少而脫寒饑之困州民獄訟亦爲衰止豈非能察見而善裁處乎儻忿其辨訴加以峻罰則物情不無所傷而事體亦有所害稱爲嚴明斯失之矣若君子則雖昭然深察毅然決行而從容中理無傷害也豈非嚴明之懿者乎

矜謹

袁安

後漢袁安爲河南尹政號嚴明然未曾以賊罪鞫人常稱曰凡學仕者高則望宰相下則希牧守錮人於聖世尹所不忍爲也聞者皆感激自勵在職十年京師肅然

出後漢書本傳舊集不載

按安之政號嚴明必不容姦矣其未嘗以賊罪鞫人蓋疾夫案吏者務爲深刻文致於賊也若彼賊狀自露非我鞫而出之雖繩以法亦何憾焉

司馬芝

魏司馬芝爲大理正有盜官練寘廁中者吏疑女工遂收付獄芝曰刑戮之失在於苛暴今先得贓物後訊其辭若不勝楚掠或至誣服豈可折獄且簡而易從大人之化也不失有罪庸世之治耳今宥所疑以隆易從之化不亦可乎太祖從其議舊出魏志本傳

王坦之

晉王坦之襲封藍田縣侯時卒士韓悵逃亡歸首云失牛故叛有司劾悵偷牛考掠服罪坦之以爲悵束身自歸而法外加罪懈怠失牛事或可恕加之木石理有自誣宜附罪疑從輕之例遂以見原出晉書王湛傳坦之其曾孫也舊集不載按訊盜練劾偷牛皆慮自誣而遂見宥合矜謹之義矣

蕭子良

任昉彈事附

南齊竟陵王子良爲會稽太守時山陰人孔平詣子良訟嫂市米負錢不還子良歎曰昔高文通與寡嫂訟田義異於此乃賜米錢以償之出南史本傳舊集不載

按梁御史中丞任昉彈中軍參軍劉整因兄寅第二息師

利按原本作第一庶息今據任昉本集改往整田上經十二日整便責寡嫂

范米六斗哺食米未展送忽至戶前攘拳大罵突進屋中屏風上取車帷準米去亦引高鳳事爲彈文蓋鳳隱者也太守連召恐不得免自言本巫家不應爲吏又詐與寡嫂訟田遂不仕若整與平意實忘義固異於此然昉請免整收治其罪而子良但賜米錢以償之不治平罪何也責士

之法不以責民是亦所以為矜謹也

陸襄

梁陸襄為郟陽內史時妖賊鮮于琮敗獲之後鄰郡豫章安成等守宰案其黨與因求貨賄皆不得實或有善人盡室罹禍惟襄郡境枉直無濫人歌之曰鮮于抄後善惡分人無橫死賴陸君

出南史陸慧曉傳襄其從孫也舊集不載

按推窮賊黨者苟不矜謹必至枉濫彼使善人盡室罹禍與賊何異哉襄之用心獨異於彼宜其人歌之也

宋世軌

蘇瓊附

北齊宋世軌為廷尉少卿洛州人聚結欲劫河橋吏捕按之連諸元徒黨千七百人崔昂以為反數年不斷及世軌為廷

尉判其事為劫唯殺魁首餘從坐悉捨焉

出北史宋隱傳世軌其族孫也舊集

不載

按蘇瓊為三公郎中時頗有告謀反付瓊推檢事多中雪崔昂為尚書謂瓊曰若欲立功名當更思餘理乃數雪反逆身命何輕耶瓊正色曰但雪冤枉不放反逆昂大慙夫崔昂亦善折獄其意如此乃韓伯奇所謂考囚者咸共言妖惡大故臣子所宜同疾今出之不如入之可無後責是以考一連十考十連百者也且昂於此獄數年不斷豈非求反狀未得乎世軌判為劫事理所當然斯可以無慙於瓊矣是皆矜謹之君子也

郎茂

陸襄附

隋郎茂初授衛州司錄有能名尋除衛國令

隋諸王置國官有令一人至湯

帝時改國令為家令

有部人張元預與從父弟思蘭不睦丞尉請加嚴

法茂曰元預兄弟本相憎嫉又坐得罪彌益其忿非化人之

意也乃遣縣中耆舊更往敦諭道路不絕元預等各生感悔

詣縣頓首請罪茂曉之以義遂相親睦稱為友悌

出北史郎基傳茂其

子也舊集不載

按梁陸襄為鄱陽內史有彭李二家先因忿爭遂相誣告

襄引入內室不加責謂但和言解諭之二人感恩深自咎

悔乃為設酒食令其盡歡酒罷同載而還因相親厚

出南史本

傳舊集亦不載夫異姓之疏也誣告之怨也猶可和解使相親厚

況親族之不睦者乎彼猶未容責謂此可遽加嚴法乎矜

謹之士宜鑒于茲故並著焉

張詠 王質附

張詠尚書再知益州民有負販者翁役其婦婦違之翁怒剪

其髮曰我作婢使汝其子自外歸作鬧所由具事領過或謂

其子曰翁翦婦髮何罪子若執父汝罪不輕至廳下詠詰之

翁云婦自翦髮泥其子亦云妻自翦髮泥翁詠察其誑即于

解狀後判云雖然子為父隱其奈執辭不定既不可窮詰於

尊長又不可抑斷於卑幼仰責新婦狀今後再不侍養別具

狀領過並放詠謂掾屬曰五服之內卑幼條至重親民之官

所宜盡心 見李暉虞部所撰忠定公語錄

按王質待制知荆南有媪訴其婦薄於養婦言舅亡姑嫁

既窮而歸且奉事無不謹質曰姑雖不良獨不顧夫耶因取家人衣以衣媪又給以廩粟使歸養之皆感泣而去見本傳此其翁姑理皆不直然家人之義當責卑幼但不可遽繩以法耳是故恕其罪而責之養也

薛奎 仇覽 韋景駿 二事附

薛奎參政知益州有婦人訟其子不孝詰之乃曰貧無以養奎因出俸錢與為資業而遣之見本傳

按後漢仇覽為蒲亭長有陳元者獨與母居而母訟元不孝覽驚曰吾近過元舍廬落整頓耕耘以時此非惡人當是教化未及耳母守寡養孤苦身投老奈何肆忿一朝欲致子以不義乎母感悟涕泣而去覽乃親到元家與其母

子飲因為陳人倫孝行譬以禍福之言元卒成孝子見後漢書

本傳唐韋景駿為貴鄉令有母子相訟者景駿曰令少不天

常自痛爾幸有親而忘孝耶教之不孚令之罪也因嗚咽

流涕付授孝經使習大義於是母子感悟請自新遂為孝

子見唐書本傳此皆與奎出俸錢為資業之意同矣苟繩以法

子罪不輕令律所謂可從而違堪供而闕者是也得謂

之矜謹乎

任布

任布副樞知越州民有被酒罵其祖者祖既訴之已而大悔哭於庭曰老無子賴孫以為命布特貸出之且上書自劾朝廷亦不之問見本傳

按孫罵祖法當死特貸出之理宜自劾此乃矜其失教而謹於用刑者也

蘇渙

蘇渙郎中知鄆陵縣時歲荒盜起有兄殺弟而取其衣者弟偶不死與父偕往訴之渙閱其窮而為姦問之曰汝殺而弟知其不死而捨之者何也兄喻其意曰適有見者不敢再由是得不死父子皆感泣及渙罷去負任從之數千里

見蘇轍門

下所撰墓表

按古之聽獄者求所以生之不得其所以生之者乃刑殺焉孫罵祖有可生之理以其被酒且祖自悔也兄殺弟有可生之理以其苦饑且弟不死也布之貸出其孫渙之慮問其兄皆得其所所以生之者也可無愧於古人矣

李士衡高化附

李士衡觀察初釋褐為京兆鄠縣主簿府知其才俾權獄掾咸陽縣有民殺人具獄以送府父子五人其為從者皆服加功之罪士衡告於尹曰彼殺人者止一人耳餘四人掩其骸可坐以加功寘之重辟乎尹喜從其議曰四人者非子之明則冤於地下矣

見范仲淹參政所撰神道碑

按以掩骸為加功是深文也罪不應死而文致之何其忍哉嘗聞用法殺人無異用刃殺人深文之罪縱或幸免鬼得而誅之也高化太尉雖起行伍頗知民事晚守相州部有大獄皆當論死化疑之命移他獄訊蒙活者三人殆亦

以掩骸為加功之類歟此矜謹者所以盡心也

王博文

王博文副樞知密州時負海有濤落鹽場歲歉民多盜鬻吏捕逐之輒起捍鬪皆坐法當死博文上言請權弛鹽禁俟歲豐如舊從之見本傳

按周禮荒政十有二其曰緩刑曰舍禁曰去幾者博文所請義與合焉苟非通達古今豈能矜謹如是耶

王質

王質待制嘗通判蘇州以病在告知州黃宗旦來省問因言獄有盜鑄錢者百餘人吾陰以術鈎得之質曰弋不射宿惡陰中於物也今殺數人而徒流者又數十人公陰之中也宗

旦瞿然為貸其死罪而餘悉輕出之見本傳

陳執方李士衡附

陳執方大卿通判江州時民饑有刈人之禾而傷其主法當死者執方以為古之荒政所以恤人者盡矣然尚緩刑況於今哉即奏貸其死見王安石丞

按李士衡觀察權知天雄軍民有盜瓜傷主者法當死士衡以歲饑奏貸之自是著為例執方之奏蓋用此例也見本傳

陳巽

陳巽賓客初為常州團練推官盜有棄財走者巽以為不應死通判不肯用其言巽力爭而讞之盜卒得不死見曾鞏舍人所撰神

碑道

按盜非傷主計贓為罪棄財走者豈復應死通判不肯用其言必持深刻之說故失矜謹之義也

胡向

胡向少卿為袁州司理參軍時有盜七人皆當死向疑其有冤乃留訊之則二人者果不同謀始受其傭而中道被脅以行卒得免死見呂大防丞相所撰墓誌

按捕獲盜者七人乃合格故以被脅為同謀蓋希賞耳斯不仁哉宜其留訊而卒免之也

張奎

張奎密學初為常州推官轉運使舉監衢州酒稅婺州有滯

囚法當死獄成三問輒不服命奎覆案一視牘而辨之得不死人皆服

按奎一視牘而辨之者謂辨其情理也人有迹狀重而本情輕者昔既酌情而立法今當原情以定罪安得不辨情理而抵之死耶此其精明固能服人至於矜謹尤可傳世王濟郎中為澶州司理掾時州獄有重囚臨刑稱冤濟覆案之亦得不死與此類矣豈非哀矜折獄而然歟二事並見本傳

李允元袁安附

李允元給事通判寧州時州卒謀亂事發連逮者眾允元極意辨析止坐首惡數人誅之見本傳

按後漢袁安舉能理劇拜楚郡太守時楚王英謀為逆事

下郡考覈辭所連及繫者數千人顯宗怒甚吏案之急迫痛自誣死者甚衆安到郡不入府先往案獄理其無明驗者條上出之府丞掾吏皆叩頭爭以爲阿附反虜法與同罪不可安曰如有不合太守自當坐之不以相及也遂分別具奏帝感悟卽報許得出者四百餘家允元殆有袁安之心歟事在州郡辨析固易然其矜謹亦可嘉也

李應言榮譴吳育二事附

李應言諫議爲侍御史時鄆州民傳妖法者其黨與凡百餘人捕者欲邀功賞而誣以不軌命應言往按其事止誅首謀數人悉全活之

一按榮譴大監爲開封府判官時太康縣捕民數十人事浮屠法相聚祈禳名白衣會知府賈黯疑其有妖請殺爲首者餘悉流之譴以爲本無妖黯具奏并譴議奏之朝廷以譴議爲是乃流其首餘皆杖之蓋鄆州之民傳妖法無不軌事太康之民浮屠法本無妖故輕重之差如此若非矜謹則或以爲不軌而盡誅其黨或以爲有妖而特殺其首不無枉濫矣 吳育參政知蔡州時京師謹言有妖人數千在州界詔遣中使名捕者十人至則請以巡檢兵趨確山索之育謂曰使者欲得妖人還報耶請留勿往此鄉民依浮屠法相聚耳可走一介召之立至今以兵往人心驚疑柰何中使以爲然召之果至械送闕下皆以無罪得釋而告者遂伏辜此又矜謹之大者也夫太康所捕有罪而

蔡州所送無罪何也事浮屠法相聚祈禳名白衣會法所禁也依浮屠法相聚無祈禳事非白衣會法所不禁也苟非矜謹之至豈能不濫如此哉

三事並見本傳

王琪

王琪侍郎知復州民有毆佃客死者吏將論如法忽夢有人持牒叩庭下曰某事未可遽以死論也琪疑之因留獄未決有司曰無足疑者琪曰第留之後十餘日果有新制下凡主人毆佃客死聽以減死論吏民莫不神服

見王珪丞相所撰墓誌

按此非思慮所及蓋平時矜謹故感於夢寐記曰至誠之道可以前知其此之謂歟

王延禧

王延禧朝議初為岳州沅江令歲饑盜起親獲十餘人賊皆應死法得遷官延禧歎曰是皆良民窮而為盜令既無以業之又利其死以為己功亦何忍哉諭被盜者悉裁其賊盜得不死延禧王黃州孫也

見曾肇內翰所撰墓誌

按周禮荒政曰除盜賊謂饑饉盜賊多不可以不除也延禧親獲十餘人蓋以此耳邀功希賞非其本心故諭被盜者悉裁其賊使得不死夫捕盜之官利盜之死譬猶矢人惟恐不傷人其術使之然也雖遷一官而殺數人榮不足言愧何可勝君子豈忍為是哉若殘民害物罪不可赦非窮而為盜計賊抵死者則其獲賊受賞義在懲勸君子可以無憾也延禧所捕實與此異故竊歎云爾折獄龜鑑終

於矜謹惻隱之心人皆有之爲物所遷斯失之矣故有利
人之死爲已之功者或文致於大辟或誣入於極典寧復
能存不忍之心以貸應死之命乎故著此事矜謹篇末庶
幾覽者有所警焉

折獄龜鑑卷八終

跋

觀易之象雷電皆至豐而曰君子以折獄致刑山下有火
賁而曰君子以明庶政無敢折獄蓋獄者民之命折獄者
貴其明而尤不敢輕用其明龜鑑有書所以推廣其明而
示人以謹重之意也宜春郡齋舊有折獄龜鑑歲久字畫
漫漶覽者病之余叨守旣數月獄訟簡清公暇出篋中所
藏一編參訂遴匠重刊俾覽者充拓聞見如龜決疑如鑑
燭物是亦惟良折獄之一助云景定辛酉四月上澣天台
趙時彙謹書

皇清嘉慶十四年歲在屠維大荒落余月昭文張海鵬較梓

農桑衣食撮要

欽定四庫全書提要

農桑衣食撮要二卷元魯明善撰明善元史無傳其始末未詳別本有其幕僚導江張棗序一篇稱明善威鳥

爾舊作畏吾兒今依元國語解改正人以父字魯為氏名鐵柱以字行

于延祐甲寅出監壽郡始撰是書且鈔諸梓而明善自序則稱叨憲紀之任取所藏農桑撮要刊之學宮末署至順元年六月蓋自壽陽刊板之後閱十有七年而重付剞劂者也考豳風所紀皆陳物候夏小正所紀亦多切田功古來四民月令四時纂要諸書蓋其遺意而今多不傳至元頒行農桑輯要於耕種樹畜之法言之頗詳而歲用雜事僅列為卷末一篇未為賅備明善此書

分十二月令件繫條別簡明易曉使種藝斂藏之節開
卷了然蓋以陰補農桑輯要所未備亦可謂能以民事
講求實用者矣

自序

農桑衣食之本務農桑則衣食足衣食足則民可教以禮義
民可教以禮義則家國天下可久安長治也虞夏殷周之興
罔不由此秦漢而降知恤鮮哉我世祖皇帝中統建元之初
首詔有司歲時勸課以厚民生立大司農司以專其任列聖
相承式遵祖訓凡我臣子孰敢不虔乃者叨蒙憲紀之任因
思衣食之本取所藏農桑撮要刊之學宮所以欽承上意而
教民務本也凡天時地利之宜種植斂藏之法纖悉無遺具
在是書苟爲民者人習其業則生財足食之道仰事俯育之
資將隨取而隨足庶乎教可行而民安於下矣固久安長治
之策也其可以農圃細事而忽之哉雖然游末是趨舍是書

而不務以自取貧困固吾民之罪而奪其時以落其事使是書爲徒設則有司之咎也於歲時和歲豐家給人足與吾民相忘於謠衢擊壤之域顧不美歟謹題其篇端以告來者庶牧民者知所勸也至順元年六月甲申謹敘

農桑衣食撮要卷上

墨海金壺 子部

元 魯 明 善 撰

正月 元旦宜齋戒焚香捧燭拜謝天地日月星辰國王水土祖宗父母社稷六神勿興惡念每月若遇朔望之日依上焚香拜謝福德必厚

驗歲朝

一日雞二日犬三日豕四日羊五日牛六日馬七日人八日穀日色晴明溫暖則蕃息安康風雨陰寒慘冽則疾病衰耗以各日驗之

驗歲草

薺菜先生歲欲甘葶藶先生歲欲苦藕先生歲欲雨蒺藜

先生歲欲早蓬先生歲欲荒水藻先生歲欲惡艾先生歲欲病皆孟春占之

教牛

牛者農之本爲家長者須當留心提調每日水草不可失時水牛夏間下水坑不可觸熱冬間要溫暖切忌霜雪凍餓家有一牛可代七人力雖然畜類性與人同切宜愛惜保養

嫁樹

元日五更點火把照桑棗菓木等樹則無蟲以刀斧斑駁敲打樹身則結實此謂之嫁樹

移栽諸色果木樹

古人云移樹無時莫教樹知多留宿土記取南枝宜寬深開掘用少糞水和之成泥漿根有宿土者栽於淤泥中候水喫定次日方用土覆蓋根無宿土者深栽於泥中輕提起樹根與地平則根舒暢易得活三四日後方可用水澆灌上半月移栽則多實宜愛護勿令動搖

駙諸色果木樹

樹芽未生之時於根旁掘土須要寬深尋纂心釘地根截去留四邊亂根勿動却用土覆蓋築令實則結果肥大勝插接者謂之駙樹

栽桑樹

耕地宜熟移栽時行須用寬橫行闊八步長行相離四步

對栽桑行中間可用牛耕故田不廢桑不致荒二月內移栽亦可臘月亦得

移栽諸樹

自朔暨晦可移松柏槐榆等樹二三月亦得

脩桑

削去枯枝及低小亂枝條根旁開掘用糞土培壅與臘月同此月不脩理則葉生遲而薄

種麻

古人云十耕蘿蔔九耕麻地要肥熟以土灰拌種或撒子以土灰和腐草蓋密則細疎則粗布葉則剛耘宜帶露撒灰耘糞三兩次二三月皆可種之宜早不宜遲臘月八日

亦得

種茄匏冬瓜葫蘆黃瓜菜瓜

此月預先以糞和灰土以瓦盆盛或桶盛貯候發熱過以瓜茄子插於灰中常以水灑之日間朝日景夜間收於竈側暖處候生甲時分種於肥地常以少糞水澆灌土用低棚蓋之待長茂帶土移栽則易活社後亦可種之

芋秧

先將園地鉏過一遍又以新黃土覆在鉏過地上却將芋芽向上密排種之用草覆蓋候發出三四葉約四五寸高於三月間移栽之

修諸色果木樹

削去低小亂枝條勿令分力結果自然肥大
栽葱韭薤

去冗鬚微曬乾疎行密排栽之宜雞糞培壅
種苦蕒蒿苣生菜芥

二三月皆可移種宜用盒過熟灰糞培壅之
合小豆醬

小豆蒸爛冷定團成餅盒出黃衣穿掛當風處至三四月
內用黑豆或黃豆炒過磨去皮簸淨煮熟撈出每小豆黃
子一斗熟豆一石用鹽四十餘斤拌勻擣爛入甕每日攪
動曬過七日後便可食用合醬時斟酌豆黃用之

修農具

築牆圍

開溝渠

修蠶屋

整屋漏

移栽諸般花窠

織蠶箔

二月 月內三卯有則宜豆無則早種禾農家每歲經驗之
言 驚蟄日以石灰摻於門限牆壁外則辟除諸般蟲蟻
種舊槩

宜熟耕地打成畦以舊槩撒於畦中常用水澆灌候芽出
時如法愛護冬間附地割去其窠用柴草薄蓋以走火燒

過火大則傷根糞草蓋至春耙搜去糞草用水澆灌每一窠出芽數枝留旺者一枝餘枝削去至秋長五六尺來春可移於熟地內相對作大寬行栽之

籤諸色果木

揀好嫩枝條籤於芋頭或蘿蔔頭上栽易活腦上用箬葉包之若籤諸般花枝移頭亦可

種黍稷

新開豈田爲上一畝用子四升春分前後宜用灰土和子種須鉏三五窠作一叢書曰黍心未生雨灌其心心傷無實黍心初生畏天寒次日早用糝麻散綫長繩上令兩人對持於黍上牽拽抹去其露則不傷黍刈稌欲早黍欲晚以備日用春後皆可種

種椒

諺曰稌青喉黍折頭黍稌熟時炊飯又可釀酒搗碎蒸糕擇濕潤平地深耕耙勻取上年原埋地中椒子種之用灰糞和細土覆蓋則易生來年依時分開每株約離七八尺地用麻粃灰糞栽之忌水浸根三年後換嫩枝方結實辟蛇喫椒宜種香白芷或以髮纏樹根種生菜亦得

種茶

宜斜坡陰地走水處用糠與焦土種每一圈可用六七十粒覆土厚一寸出時不要耘草早以米泔澆常以小便糞水或蠶沙壅之水浸根必死三年後可採茶相離二尺種

一叢

種西瓜

宜肥地種掘地作坑如斗大每坑納瓜子四枚多種則漫撒苗出後根下壅作土盆多鉏則饒子不鉏則無實餘蔓花掐去則瓜肥大

種葫蘆黃瓜菜瓜冬瓜茄子

宜晴明日中種之每日早以少糞水澆灌此月下旬栽五月中旬結實若三月種之已遲

種藕蓮

取藕接頭時就用帶草濕泥包裹却於池塘中栽之或用煮酒餅頭上泥栽種當年開花種蓮子用堅黑者於磚石上磨蓮子頭令皮薄則易生取墐土作泥包裹蓮子在內蓮子頭上作尖樣約三指大長二寸底下務要平重候泥乾時擲於池中重頭沉下自然周正

摘茶

略蒸色小變攤開扇氣通用手揉以竹箬燒烟火氣焙乾以箬葉收諺云茶是草箬是寶

種蘿蔔菘菜

上旬撒種三月中旬可食宜肥地以熟糞蓋

種蜀葵

院內路旁牆畔種之候花開盡帶青收其穉勿令枯槁水中澆一二日取皮作繩索用度

插芙蓉

候芙蓉花開盡帶青梢漚過取皮可代麻縲

種大豌豆

宜疎種用灰蓋地要肥頻澆灌芽出鉏去草

壓桑條

濕土壓則條爛不生根燥土壓之則易生根

種紅花

種時欲雨或漫撒或耨耩如種麻法至五月收子便種晚
花秋間八月種亦得臘月亦可

種豌豆

社前大麥根邊種之以盒過灰糞勻蓋頻鉏

種苕芾

卽獨掃

屋側路旁皆可種嫩芽可做菜食以草繩腰束九月間刈
取以石壓匾收之三月亦可種

種銀杏

於肥地內用灰糞種之候長成小樹次年移栽時連土用
草包或麻纏束栽之則易活

種紫蘇

於瓜畦邊成行撒子每叢長高可以得兩利

種蘇子

於五穀地邊近道處種收子打油燃燈甚明

種蒲萄

預先於去年冬間截取藤枝旺者約長三尺埋窖於熟糞內候春間樹木萌芽發時取出看其芽生以藤籤蘿蔔內截之埋二尺在土中則生根留三五寸在土外候苗長牽藤上架根邊常以煮肉肥汁放冷澆灌三日後以清水解之天色乾早輕鉏根邊土澆之冬月用草包護防霜凍損二三月間皆可插栽

接諸般果木

熟地內打畦成行用山桃子種芽出長成小樹次年分開相離兩步截一株候二年樹枝削去梢將桃杏李諸般果木接頭削尖似馬耳尖樣兩枝樹皮相合著就用本色樹皮一片長尺餘濶三分纏所接樹枝用桑皮裹縛以泥封

之輕攀枝梢埋於地內用木鉤釘之土培接頭上用草標記以刺棘遮護則易活

腰接 驗其樹身大者離地一尺截作木砧小者離地七八寸截時須用細齒鋸截鋸齒粗則傷樹皮於砧相對側劈開令深一寸每砧對接兩枝俱用兩樹皮相合以黃泥封之候活待發出葉去一枝弱者若接梨或林檎宜杜樹砧上接之若接栗子宜於櫟樹砧上插接之

根接 附地截去劈開接頭削尖插之黃泥封固用糞壅以草標記勿令他物動搖頻澆水卽活

三月 月內三卯有則宜豆無則宜麻麥此農家經驗之言也

收薺菜花

三月三日收席鋪牀下去蚤鋪竈上去蟲蟻

種大豆

宜上旬種杏花盛桑椹赤夏至後二十日皆可種肥地則宜疎瘦地則宜密纔出便耘莢赤莖蒼則收槐樹不生蟲
宜豆忌申卯日種

犁秧田

其田須犁杷三四通用青草厚鋪於內盪爛打平方可撒種爛草與灰糞一同則秧肥旺

浸稻種

早稻清明節前浸晚稻穀雨前後浸其浸用稻草包裹每裏包一斗或斗五投於池塘水內浸不用長流水難得生芽浸三四日微見白芽如鐵尖大然後取出擔歸家於陰處陰乾密撒於秧田內候八九日秧青放水浸之糯稻出芽較遲可浸八九日如前微見白芽出時方可種或於缸裏內用水浸數日撈出以草盪生芽依前法撒種候芒種前後插秧

種粟穀

浸穀用臘雪水浸過耐旱辟蟲傷春種欲深夏種欲淺凡種穀遇小雨宜趁濕種大雨鉏一遍然後搆種鉏不厭頻多鉏則不秕細而結實熟則宜速刈乾則宜速積過熟則拋費

種山藥

預先鉏地成坑壟以芝麻穉鋪填揀山藥上有白粒芒刺者用竹刀切下一二寸作一段相挨排队臥種覆上五寸旱則澆忌人糞宜牛糞麻粃生苗鉏耘以竹木扶架霜降後收子種亦得立冬後根邊四圍寬掘深取則不碎一名黃獨其味與山藥同以菜豆殼麻粃腐草或小便草鞋包種之四畔用灰則無蟲傷

種香菜

常以洗魚水澆之則香而茂溝泥米泔尤佳

種芋子

宜近水肥地種每窠根邊用盞過菜豆殼壅之或用麻灰

種紵麻

糞牛羊踏過爛草壅其周圍則易長大有草宜頻鉏之旱以水澆灌人家園邊水側皆可種忽值饑年可接糧食用

種秫黍

此月內於肥地內撒之以草蓋用蠶沙壅二年後移疎行密栽用灰糠拌之寒露後收子十月以後用牛馬糞勻蓋其根則免致凍死

種藍

柴燒城郭間貨賣多得濟益也

將平地耕熟下種用鐵耙勻上用荻簾蓋之每日早用水

農桑衣食攷要卷一
灑至生苗去荻簾長至四寸高以熟肥地成畦打溝成行
每五寸地栽一窠每日用水澆灌如地瘦則用薄糞水澆
一二次至七月間收刈採藍取汁之方開載七月

種騮

騮音殿
俗作駮

此月宜下種比及種時先於年前八九月間耕地一遍杷
平臘月間復耕地一遍臨種時又耕一次撒種後橫豎復
杷三四次生四五葉時卽鋤後有草再鋤至五月間收刈
打騮

種薑

清明後三日封薑立夏後蠶大食時生芽未可移種先用
蠶沙麻灰盒糞熟過以大麥地上做壟則四畔泥不流
下每壟闊三尺揀有芽者一尺一窠欹斜種坑內用灰糞
蓋厚三寸上用土一寸以腐草蓋之六月棚蓋或插蘆蔽
日東西爲坑坑口種芋頭以遮日色

種甜瓜

鹽水洗子用盒過糞土種之仍將洗子鹽水澆灌候施秧
時掐去苦心再用糞土壓根實

種芡筍菰菰

先掘地深用蘆席鋪填排菰於上用泥覆水浸之種芡
筍不用蘆席止於水邊深栽之

種紅豇豆白豇豆

穀雨前後種六月收子便種再生八月又收子

種芝麻

宜肥地內種此月爲上時每畝用子二升上半月種者莢多頻鉏草淨收刈束欲小大則難乾以五六束爲一束斜倚之則不被風雨所倒候口開抖下依舊叢依之三日一次敲打白者油多四五月間亦可種之又云胡麻

種黑豆

種時熟耕耙地平內握豆半抄行一步一撒苗旺便鉏草淨爲佳四月亦可種其豆可作醬及馬料稽稈可以作柴城郭中貨賣得濟

種木棉

先將種子用水浸灰拌勻候生芽於糞地內每一尺作一

穴種五七粒候芽出時稠者間去止存旺苗二三窠勤鉏常時掐去苗尖勿要苗長高若苗旺者則不結至八月間收棉

種茴香

收子陰乾向陽掘地糞土和子種之種麻一窠以遮日色十月碾去枯梢以糞土壅其根

移槐子

帶花移易活梅雨時插嫩枝易生根要鉏淨

鉏蒜

候苗高尺餘頻鉏澆灌拔去蘆則結實肥大

種枸杞

鉏肥熟地作平畦紐草稔如臂大

按原本作細草稔如臂大禱字無攷博聞錄載

種枸杞法作紐草稔如臂大鋪填於畦中以泥塗稔上然說文稔束稔也今並據改正

後種子用細土及牛糞覆令勻苗出頻澆之春間嫩芽葉

可作菜食

移石榴

葉未生時用肥土於嫩枝條上以席草包裹束縛用水頻沃自然生根葉全截下栽之用石膏之類覆蓋則易活或於盆器內栽亦得

養蠶法

繭種為先開簇時先將好繭擇出於淨箔薄攤開日數至自然生蛾若有拳翅禿眉焦尾赤肚無毛等蛾揀去不用

上留無病者勻布連上生子既多待二三日移蛾下連至十八日後早晨汲井水浴一次浸去蛾便溺毒氣夏秋於通風涼房內連背相靠鈞掛至十月內捲收於無煙淨屋內頓放臘八日依前浴畢於中庭用竿高掛以受辰精月華之氣

四月 月內三卯有則宜麻無則麥不收此是農家經驗之言 初八日雨下則無麥十三日亦然此老農有驗之言 防露傷麥

但有沙霧用絲麻散絳長繩上侵晨令兩人對持其繩於麥上牽拽抹去沙霧則不傷麥

斫楮皮

非此月而斫者多致枯死十二月斫者亦可

做笋乾

笋肉一百斤用鹽五升水一小桶候沸湧拗取汁候乾旋添汁煮熟撈出壓之或用手揉在鍋隔夜則黑熟曬則枯一日曬乾則硬不揉則不軟臨食時取浸笋汁煮笋則有味

煮新笋

以沸湯煮則易熟而脆味尤美若蕪者少入薄荷同煮則不蕪與猪羊肉同煮不用薄荷

收諸色菜子

斫倒就地曬打收之用餅罐盛貯標記名號

蟲不蛀皮貨

用莞花末摻之不蛀或以艾捲於皮貨內放於甕中泥封其甕或用花椒在內捲收亦得

蟲不蛀氈毛物

用莞花末摻之或取角黃又名黃蒿五月收角曬乾布撒或毛物氈內捲收之則不蛀

收杏子

杏熟時收核至秋冬間敲取仁揀去山杏仁及雙仁有毒者去尖皮惟取極細收貯食用

造酪

爛子半勺鍋內炒過後傾餘爛熬數十沸盛於罐中候溫

用舊酪少許於爛子內攪勻以紙封罐口冬月暖處夏月涼處頓放則成酪

五月

午日浸蠶種

以蒲艾揉井水略浸去尿收掛勿令烟熏損

午日嫁棗

用斧於樹上斑駁敲打遍則結實肥大味美

插稻秧

芒種前後插之拔秧特輕手拔出就水洗根去泥約八九十根作一小束却於犁熟水田內插栽每四五根爲一叢約離五六寸插一叢脚不宜頻那舒手只插六叢却那一

遍再插六叢再那一遍逐旋插去務要窠行整直

斫桑

斫桑不可留梢角比及夏至開幄根下可用糞或蠶沙培一壅此時不斫則枝條來春不旺

收椹

椹子熟時摘取以水淘過略曬乾便種同二月法或畦種之便生卽時多收椹子以待來春種尤佳收貯勿近濕壁牆邊則沓損不生

權桃李梅核

宜和肉肥地內種來年成小樹帶土移栽

移竹

五月十三日謂之竹迷日可用馬糞和糠泥做漿栽之切
忌用腳踏推打則次年便出笋

刈紵麻

看根赤便刈刈畢宜用蠶沙麻粃糠秕或糞壅之盛旺於
此月刈一鎌六月半刈一鎌八月半刈一鎌隨卽用竹刀
從梢分批開剝下皮以刀刮去白瓢浮上粗皮自然脫去
縛作小束搭於房上夜間得露水露之則麻潔白

收小麥

麥半黃時趁天晴著緊收刈過熟則拋費每日至晚載上
場堆積農家忙併無似蠶麥若遲慢遇雨多爲災傷又秋
田苗稼亦誤鉏治

收紅花

侵晨採花微擣細去黃汁用青蒿覆蓋一宿捻成薄餅子
曬乾收之勿近濕牆壁則滷損

種夏蘿蔔鬆菜

上旬撒子用灰糞蓋頻澆灌六月中旬可食

壅田

以青草踏於泥內則地肥秧窠旺與灰糞同

收豌豆

諸豆之中豌豆耐陳收多熟早如近城郭摘豆角賣先可
變物舊時農莊往往獻此豆以爲嘗新蓋一歲之中貴其
先也按此條舊本有脫文
今從務本新書補入

刈黥

夏至前後看葉上有皺紋方可收刈每五十斤用石灰一斤於大缸內水浸次日變黃色去梗用木杷打轉粉青色變過至紫變花色然後取清水成黥種黥之方先於三月
中具載

造酥酒

以酪盛於桶內或甕中安置近屋柱邊可將竹篾或桑條作二小圈或用二小木板別作一木鑽下釘圓板一半放置桶中一半套於上下圈內却於兩圈中間木鑽上以皮條或繩子纏兩遭兩手牽拽鑽之令轉生沫傾於涼水中凝定候聚得多却於慢火煉過去浮上焦沫即成好酥

曬乾酪

將好酪於鍋內慢火熬令稠去其清水攤於板上曬成小塊候極乾收貯切忌生水濕器

六月

合醬法

用豆一石炒熟磨去皮煮軟撈出用白麵六十斤就熱攪麵勻於案上以箬葉鋪填攤開約二指厚候冷用楮葉盛蒼耳葉搭蓋發出黃衣爲度去葉涼一日次日曬乾簸淨擣碎約量用鹽四十斤無根水二擔或稀者用白麵炒熟候冷和於醬內若稠者用甘草同鹽煎水候冷添之於火日晩間點燈下醬則不生蟲加蒔蘿茴香香草葱椒物件

其味香美

做麥醋

大麥一石或三五斗炒過取一半細碎取一半完全先以細碎者浸一宿次日蒸成飯用楮葉蓋盒成黃子七日後以完全者浸一宿炊成飯以炊湯半鑊候溫將黃子同釀密封蓋如不密封則生蟲過七日後則成醋二七日後出頭鍋醋煮過收貯二糟有味再釀之

做老米醋

將陳倉秬米三斗或五斗淘淨水浸七日每日換水一遍七日後蒸熟候飯冷於席箔上攤開以楮葉蓋覆發黃衣遍曬乾臨下時簸淨每黃子一斗用水二斗入甕內又用紅麴一合溫水泡下將甕口封閉二十日看一遍候白衣面墜下或白衣不下澄清以味酸爲度去白衣將醋鍋內熬一沸又炒鹽少許候冷用潔淨餅甕收貯以泥封之可留一二年

做米醋

用秬穀三斗每日換水浸七日蒸熟攤開盒成黃子曝曬乾極三伏內以糙糯米一斗五升水略浸蒸熟候冷以穀黃搗碎拌和蒸熟糯米缸底先用蓼子數莖然後入缸內用水五升上又用蓼子數莖以米糠蓋之密糊封閉一月然後筍出用烏梅數箇鹽少許同入餅內煮數沸泥封收貯切忌生水濕器盛頓

做蓮花醋

白麵一斤蓮花三朶擣細水和成團用紙包裹掛於當風處一月後取出以糙米一斗水浸一宿蒸熟用水一斗釀之用紙七層密封定每層寫七日字遇七日揭去一層至四十九日然後開封筊出煎數沸收之如二糟有味用滾水再釀儘有日用忌生水濕器收貯

做豆豉

大黑豆淘淨煮熟漉出篩麵拌勻攤於席上放冷用楮葉盪成黃子候黃衣上遍曝乾用瓜茄切片二件每一斤用淨鹽一兩入生薑橘皮紫蘇蒔蘿小椒甘草切碎同拌一宿次日將豆黃簸去黃衣同入甕內用元汁勻拌上用箬葉蓋覆甕石壓定紙泥密封曬半月後可開取豆瓜茄曬乾略蒸氣透再曬收貯

造麩豆

麥麩不限多少以水勻拌熟蒸出放溫蒿艾盪出黃衣曬乾以水勻拌帶潤却入缸甕實捺定倒合庭中地上以少灰圍之七日外取出攤曬若顏色未深又拌依前法色好爲度色黑又蒸熟入甕捺入泥封至冬取食溫暖

醬醃瓜茄

新摘瓜茄鹽醃二三日於醬內醃之則肥美

耕麥地

此月初旬四五更時乘露水未乾陽氣在下宜耕之半得

其涼耕過地內稀種菜豆候七月間犁翻豆秧入地勝如用糞則麥苗易茂

收椒

中伏後遇天色晴明帶露收陰一日之後曬三日則紅而裂遇雨薄攤當風處頻翻若蠶則黑又不香仍收椒子用乾土和拌攪勻埋於避雨水地內約深一尺勿令水浸生芽至來年二月內取出於肥地深耕依前法種之

種菜豆

立秋前宜刈了麻地上種太早不生角若預占豆收否當年李不蛀則宜豆忌卯日下種

刈麻

麻稈上生白碯按碯字無考羣芳譜引此條云麻稈上生白膩時便刈則此碯字應作膩字時卽刈攤宜薄束宜小漚宜清水生熟要浸宜帶骨麻一斤可取皮四兩

耘稻

稻苗旺時放去水乾將亂草用脚踏入泥中則四畔潔淨用灰糞麻粃相和撒入田內曬四五日上乾裂時放水淺浸稻秧謂之屏田此月正宜加力六月一次七月一次依上耘

曬小麥

宜三伏日曬極乾方收用蒼耳辣蓼同收之

種蘿蔔

農桑衣食撮要卷一
宜肥地撒種沙地尤效瘦地用糞作壟種帶露耙地則生
蟲鋤不厭頻苗稠則小拔令稀則肥大霜降後或醃或藏
窖皆可

農桑衣食撮要卷上

農桑衣食撮要卷下

七月

種胡蘿蔔

宜於伏內畦種或肥地漫種頻澆灌則肥大

種晚瓜

諸般瓜子於肥地內種則瓜肥大可以糟藏

收紫草

用火燒其根陰乾用草包收掛之則葉不落

種菠菜

又名赤根菜

用水拌子浸二三日看殼軟撈出控乾就地以盆合蓋候
生芽宜肥地虛土內種之則茂

做葫蘆茄飽乾

茄切片葫蘆飽子削條曬乾收依做乾菜法

取漆

以斧斫破其皮用竹管承之滴下則成漆

八月

種大麥小麥

田宜熟耕犁古人云無灰不種麥兩經社日佳白露節後逢上戊日每畝種十二升中戊日每畝種子五升下戊日每畝種子七升以灰糞勻拌密種之若當年杏多不蛀則宜大麥忌子日種桃多不蛀則宜小麥忌戌日種

防霧傷棗

棗熟著霧則多損用糝麻散塗於樹枝上則可辟霧氣或用稽稈於樹上四散綵縛亦得

糟薑

社前取薑用布擦去皮每一斤用鹽二兩臘糟一升醃藏用乾淨罐盛頓忌生水濕器

種葱子

上旬治畦用灰糞勻細撒子來年三月移栽

分韭菜

韭根多年交結則不茂別作畦分栽摘去老根微留嫩根栽之用雞糞壅或乾猪糞亦可

種雞頭

種菱
秋間子熟時收取孳子散於池內來年自生

種蒜
秋間菱角黑時收取撒在池中則自然生之

宜熟地耕三次以耬耩成溝二寸一窠種之候苗出時鋤不厭頻常令根旁潔淨須要鋤地令虛以糞水澆灌則辦肥大不然則瘦小

放芋根

此月芋苗正旺鋤開根邊上却上別泥及蟠稈葉則力回芋頭與子肥大不然苗盛芋小

栽木瓜

秋社前後移栽之次年便結子勝如春間栽壓枝亦生栽種與桃李法同霜降後摘取

收柿漆

每柿子一升搗碎用水半升釀四五時榨取漆令乾漆水再取亦得可以供做繖者用度

鋤竹園

以稻糠或麥糠壅不可雜用或添河泥蓋之

收鵝鴨彈

水鄉居者宜養之雌鴨無雄若足其豆麥肥飽則生卵可以供厨甚濟食用又可以醃藏

九月

寒露收茶子紵麻子

熟時收子曬乾以濕沙拌勻篋內盛貯用草蓋覆凍損則不生候來年二月間依法種之

栽諸般冬菜

栽時每窠根下須用熟糞移栽並在寒露前

刈紫草

子熟卽刈之曬乾打子濕則沤耙耨整理收草宜速遇雨則損每一小束茅草束之當日斬齊一顛一倒十層堆塚平地上以板石壓令匾於屋下陰涼處棚上頓放勿令烟熏

收芝麻稈

芝麻稈收入米倉內則米不蛀乾曬可點火

收栗

和殼收用沙缸內盛頻種時揀大栗埋屋簷下用糠沙蓋石壓至二月移以芽向下栽之

收茄種

熟時摘取擘破水淘子取沉者曬令乾收之

收諸色豆稈

冬間可餵牛馬損爛者留以種芋頭山藥

收五穀種

揀擇好穗刈之曬乾打下簸去浮秕以穰草裹收勿貯器中亦不得近牆壁濕地恐沤損

種油菜

宜肥地種之以水頻澆灌十月種則無根脚

醃芥菜

取紫青白芥菜切細於沸湯內灼過帶湯撈於盆內與生
高苣同熟油芥花或芝麻白鹽約量拌勻按於甕內熟則
攪動按下待二三日變黃色可食至春間味不變十月亦
可醃

醃藏諸般菜

葱韭胡荽冬瓜茄子胡蘿蔔等菜可依時候醃藏所用物
料宜者為佳忌生水濕器收貯

藏薑

宜掘深窖以穀稗糠秕合理之則不致凍損

收雞種

霜降時收者為良形小毛淺脚細短者佳小雞出時宜餵
乾飯若餒濕飯則臍生膿而死燒柳柴其烟損雞大者宜
日小者多死餒小麥飯則易大有病灌清油則愈勿令食
其時

十月

醃蘿蔔

蘿蔔不論多少削去根鬚淨洗以鹽擦之放於甕內醃五
六日下水時復攪勻一月後可食用一二鵝梨則香脆春
間有食不盡者就以鹵水將蘿蔔煮透控乾入醬或切作

細條曬乾收起候臨食之時熱湯浸透炒食味美

醃鹽菜

白菜削去根及黃老葉洗淨曬乾每菜十斤鹽十兩用甘草數莖放在潔淨甕盛將鹽撒入菜了內排頓甕中入蔣蘿少許以手實捺至半甕再入甘草數莖候滿甕用磚石壓定醃三日後將菜倒過掏出鹵水於乾淨器內另放忌生水却將鹵水澆菜內候七日依前法再倒用新汲水滄浸仍用磚石壓之其菜味美香脆若至春間食不盡者於沸湯內灼過曬乾收貯夏間將菜溫水浸過壓水盡入香油勻拌以甕碗盛頓飯上蒸之其味尤美

收荳蓬菜

此月地將凍宜於暖處藏窖來春可栽種

收冬瓜

宜地面高燥處安頓忌鹽醋掃帚猶犬帶彎曲貼肉是雌者可做種來年春間依法種之

藏收諸色果子

以新瓦甕和沙拌密封蓋收之或芝麻亦得

壅苧麻

宜用牛馬糞或廐泥糠秕之類免致凍死根

耘麥

麥地內有草鉏去尤佳不耘鉏者其麥少收

包裹木瓜石榴諸般等樹

以穀草或稻草將樹身包裹用草繩或麻絲定泥封以糠秕培壅其根免致霜雪凍損

割蜜

天氣漸寒百花已盡宜開蜂窠後門用艾燒烟微熏其蜂自然飛向前去若怕蜂蜇用薄荷葉嚼細塗在手面上其蜂自然不蜇或用紗帛蒙頭及身上截或用皮五指套手尤妙約量存蜜自冬至春其蜂食之餘者揀大蜜脾用利刀割下却封其窠將蜜脾用新生布紐淨不見火者爲白沙蜜見火者爲紫蜜入篋盛頓却將紐下蜜粗入鍋內慢火煎熬候融化拗出粗再熬預先安排錫鏟或盆瓦各盛冷水次傾蠟汁在內凝定自成黃蠟以粗內蠟盡爲度要知其年收蜜多寡則看當年雨水如何若雨水調勻花木茂盛其蜜必多若雨水少花木稀其蜜必少或蜜不敷蜜蜂食用宜以草雞或一隻或二隻退毛不用肚腸懸掛窠內其蜂自然食之又力倍常至來春二月間開其封視之止存雞骨而已

收猪種

取短喙無柔毛者良喙音穢俗稱猪嘴一廂有三牙者難留難肥小時餒糟不長猪瘟病灌以黃梔或斷毛尖啖以水草菜豆或灌米泔或灌鹽水卽愈

造牛衣

將蓑草間蘆花如織蓑衣法上用蓑草結綴則利水下用

蘆花結絡則溫暖相連織成四方一片遇極寒鼻流清涕腰軟無力將蓑衣搭在牛脊背用麻繩紮繫可以敵寒免致凍損

泥飾牛馬屋

天色晴明修補屋漏又泥飾牆壁預備雨雪

十一月

壅椒

宜用焦土乾糞培壅與草蓋免致凍死頻以水澆灌此物乃陽中之樹所以不耐寒凍也

種松杉檜柏等樹

自冬至後至春社前皆可種之則易得生活

鉏油菜

鉏淨加糞壅其根此月不培壅來年無根脚

試穀種

冬至平日量五穀種各一升按崔寔曰平日量五穀各一升據此則應作冬至日平日量五

穀種各一升用布囊盛頓於北牆陰下埋之於冬至後十五日

又云四十九日取出平量息最多者來歲好收宜多種之

鹽鴨子

自冬至清明前每一百箇用鹽十兩灰三升米飯調成團

收乾糞內可留至夏間食

收牛糞

多收堆聚春暖踏成整坯於蠶房內燒宜蠶

修池塘

宜於農隙之時填補埂岸令高中間要挑掘令深則聚水寬廣可以防備乾旱澆灌田禾

十二月

栽桑

掘坑深闊約二小尺却於坑畔取土糞和或泥漿將桑根埋定再用糞土培壅微將桑栽向上提起則根舒暢復用土壅與地平次日築實切不可動搖其桑加倍榮壯勝如

春栽

修桑

削去小枝葉則枝條茂盛去其枯枝則不荒

浴蠶連

臘月八日以水浴之遇雪水尤佳歲除夜用五方草即馬齒菜也用桃符木鉏以水煎之放冷於元日五更浴之辟諸惡厭魅則宜蠶

收蓐草

刈茅草乾蒿收積勿令雨損來春作蠶蓐則宜蠶簇作繭加倍厚實其絲更好

種麻絲

宜犁熟肥地臘八日為佳與正二月種者同

擣磨乾桑葉

臘月內製者能消蠶熱病擣磨成麵入潔淨甕內收貯飼

蠶刺餘者可做牛料甚美食之

伐竹木

此月伐竹木則不蛀而堅與七月間斫者同

收雪水

雪者天地之氣五穀之精浸諸色種子耐旱不生蟲淋猪
清治小兒癩疹調蛤粉治痱子

造油

臘月所榨清油收貯蠶房內點燈諸蟲不入熬膏藥大有
神效婦人搽頭黑光更無蝨蟻

收臘酵渾頭

酵音教

乾糟用鹽水拌捺實泥封則香帶酒則酸不香酵子渾頭

曬乾為細末用淨鹽拌勻捺入甕中曬旬日間自然成醬
其味甘美並無蠅蟲

收鰵魚

臘八日收鰵魚治小兒癩疹不出燒存性研極細用淡酒
調服即發懸厠上不生蟲

收猪脂肪

背陰處懸掛能治諸般瘡疥敷湯火瘡及六畜瘡疥去蛆
蠅熟諸般皮條不爛加倍壯勒

臘肉

肉一斤鹽一兩半擦之擦參入聲壓五六日入酒糟或濁酒翻
轉了再壓五日背陰處亮乾若生白瘡以泥封一宿煮如

農桑衣食撮要卷下
故黑豆中藏可過夏月

收羊種

臘月生者良正月亦好春夏早放早收若收晚遇巳午時
熱必汗出有塵土入毛內卽生瘡疥秋冬晚放若放早喫
露水草口內生瘡又鼻生膿久在泥中則生繭蹄性好鹽
常以鹽啖爲妙若有疥便宜間去則免致相染

農桑衣食撮要卷下終

皇清嘉慶十有三年歲在著雍執徐陽月昭文張海鵬較梓

